


VIJESTI

Gradsko vijeća Sarajeva je na sjednici 27. januara 2021., na prijedlog Udruženja za modernu historiju, Robertu J. Doniji dodijelilo priznanje Počasni građanin Grada Sarajeva.

Robert J. Donia je svojim istraživačkim radovima i posebno knjigom *Sarajevo. Biografija grada* snažno doprinio promociji historijske istine o Sarajevu kao gradu multietničke tolerancije i antifašističke borbe za slobodu. Posebno je doprinio širenju istine u Evropi i svijetu o otporu građana Sarajeva u vrijeme agresije i opsade grada od 1992. do 1995. godine.




Nakon uspješno realiziranih niza projekata u 2020, u januaru 2021. već su obavljene razgovori u vezi s realizacijom projekata u 2021. godini, kao što je organizacija History Festa (koji će se ove godine održati od 8. do 12. juna), ali i o drugim, prije svega izdavačkim projektima Udruženja. U januaru je predsjednik Udruženja razgovarao u Heinrich Boell Stiftung, Ured u Sarajevu, u vezi s daljim razvojem saradnje.

NOVE KNJIGE

Udruženje za modernu historiju je objavilo knjigu „Ratovi 1990-ih u regionalnim historiografijama: kontroverze, interpretacije, nasljeđe“. Knjiga je rezultat Ljetne škole održane u Beogradu 2020. u okviru projekta *Ko je prvi počeo – istoričari protiv revizionizma*, čiji je nosilac bilo udruženje *Krokodil* uz pomoć Kancelarije Evropske unije u Beogradu i Foruma ZFD. Ovi objavljeni radovi su rezultat istraživanja mladih historičara o jednom od najosjetljivijih sadržaja ratova 1990-ih: definicija ratova, njihovo datiranje, interpretacija nekih ključnih ratnih događaja – opsade Dubrovnika, Vukovara i Sarajeva, kako se komemoriraju i obilježavaju dva traumatična događaja – genocid u Srebrenici i vojno-policijska akcija „Oluja“, te kako se u udžbenicima historije interpretiraju ratovi 1990-ih godina.

U radovima se komparativno proučavaju historiografska tumačenja nekih od najkontroverznijih događaja, zbog čega imaju i pionirsku ulogu u proučavanju međusobnog uticaja politike i historiografije.



JAVNE DISKUSIJE



Nakon objavljivanja knjige „Nadživjeti carstva: islam, nacionalni identitet i politička lojalnost“, autora Xaviera Bougarela, reagirao je dr. Mustafa Cerić tvrdeći da autor nije dobronamjeran, da ne poznaje dovoljno muslimane i Bošnjake te da ima „zloćudne namjere“ prema Bosni i Bošnjacima. Mediji u Bosni i Hercegovini su tokom januara 2021. o tome pisali, a vodila se diskusija i po društvenim mrežama. Stav Udruženja za modernu historiju, kao izdavača, je da knjigu prvo treba pročitati, a iz stavova koje iznosi može se zaključiti da dr. Mustafa Cerić to nije učinio, pa tek potom otvoriti diskusiju o glavnim tezama. Knjiga govori znatno šire o odnosu islama, Bosne i Hercegovine i nacionalnog identiteta, obuhvata razdoblje od kasnog osmanskog doba do najnovijeg vremena i ne može se svesti samo na pitanje pokušaja reislamizacije tokom 1990-ih godina, na šta se fokusirao dr. Cerić.

Objavljivanje ove knjige u prijevodu na bosanski jezik ne znači promociju „negacije svega što nas čini to što jesmo“, kako tvrdi Mustafa ef. Cerić, jer knjiga ne negira to što muslimani i Bošnjaci jesu nego samo na način drugačiji od Mustafe ef. Cerića interpretira taj identitet.

Osim toga, Udruženje za modernu historiju se zalaže za slobodu naučnih istraživanja i protiv se bilo kakvom sputavanju naučne misle u Bosni i Hercegovini.

Kontaktirajte nas

umhissarajevo@gmail.com

Posjetite naš web na www.umhis.ba